

(P)

GRUMMERT



5877/P

DISSERTATIO INAUGVRALIS MEDICA  
DE  
VARIOLIS CATARRHALIBVS

---

QVAM  
CONSENSV INCLYTI MEDICORVM ORDINIS  
PRO OBTINENDIS  
SVMMIS IN MEDICINA ET CHIRVRGIA  
HONORIBVS

IN  
ACADEMIA GEORGIA AVGVSTA

D. XVII. JUNII MDCCLXXXVI.

PVBLICE DEFENDET

A V C T O R  
CAROLVS MICHAELIS GRVMMERT

MOSCOVIA RUSSUS.

---

G O T T I N G A E  
TYPIS JOANN. CHRISTIAN. DIETERICH.



SPURMECT, C.M.



---

*De*  
*variolis catarrhalibus.*

---

§. I.

**V**ariolarum morbus est exanthematicus, febrilis atque contagiosus. Generatim quatuor distincta percurrit tempora hic morbus; quando videlicet variolarum venenum cum corpore communicatur, quaedam localia primum excitat symptomata. — Quodsi aegroto ante inoculatae sunt variolae, per duos primos dies in infitionis loco nullam plane mutationem cognoscimus, tertio vero die levis quaedam sese ostendit inflammatio, sub forma subflavae et rubicundae maculae; quarto ac quinto die rubor in circulum dilatatur, atque stigma paululum elatius redditur. Alii aegrotorum tunc temporis, plerumque de pruritu queruntur, alii vero de doloribus sub axillis atque in suprema brachii parte.

parte. In naturali infectione saepissime etiam primis diebus vnam solummodo variolam animaduertimus, quae a generali deinceps futura eruptione non dissimilis, eundemque processum habet, quam Angli Master-Pox appellant; cum autem in naturali infectione maxima ex parte per os variolarum venenum corpori inferatur, primas omnium mutationes in praecordiis praecipue obseruamus: aegrotantes enim anxietatibus in praecordiis laborant, et inquietus ac turbatus ipsis est somnus, atque ciborum taedium. — Septimo die vix adueniente variolarum venenum ita est multiplicatum et auctum, vt totum et reliquum neruorum systema adgrediatur, ac generales commoueat motus febriles. — Die octauo ac nono symptomata augentur, ipsa febris crescit, aestus ac frigores inter se alternant, lassitudo, sitis, dolores oriuntur in membris circa lumbos, in oculis, in capite, collo &c. Quod igitur iam enarratum primum est stadium, quod plurimumque per nouem dies durat, variolis deinde erumpentibus, secundo stadio locum cedens. — Illud vero primum temporis spatium non semper eiusdem est diuturnitatis. Vir ill. STROMEYER, docens mihi valde colendus, communicauit casum; se infantem recens natum conspexisse, cui nutrix destinata esset, quae antea alii infanti variolis laboranti prae-buit lac suum, quod vero omni cum studio negauit, et cum quarto iam post infantem natum die variolae circa eius labia, in ore ac in facie, efflorescere coeperint; hic verosimile est,

vt



vt ipsa tenerrima subiecti structura veneni praematurae evolutioni maxime idonea fuerit. Forsan etiam aliae hoc efficere possunt causae, si nempe in ipsa infectione in terrorem incidat, aut tempore quo dentes erumpere solent, variolis inficiuntur, quo multo irritabiliores atque aptiores sunt, ad variolarum venenum excipiendum. — Sic quoque aut minus aut magis coctum et saturatum pus, quod in infectione adhibetur, ad feriores aut maturiores variolarum eruptionem quidquam forte conferre poterit. Secundum stadium decimo plerumque die initium capit suum ab infectione, aut quarto, ex quo febris est orta; fermentatio a variolarum veneno in corpore humano commota desinit, et natura inter crises focias deponit materiam perniciosam ad superficiem corporis in paruulorum, rubicundorum atque elatorum punctorum forma, quae primum in facie, collo et pectore, et dein in ceteris corporis partibus produnt, simul caetera symptomata omnia mitescunt et febris cessat; hoc stadium durat per duos aut plurimum per tres dies. — Tunc tertium exoritur stadium, in quo variolarum cacumina altius surgunt, et albidiora redduntur, in quibus initio tenue et aquosum pus apparet, quod pedetentim densius et magis flauum fit, cutis interiacens etiam extentatur, rubicunda fit et dolores procreat. — Febris cum aliis symptomatibus, quae variolarum eruptione peracta prorsus desinebant, redeunt, ipsae corporis partes pro ratione

riolarum eruptione intumescunt, et quidem primum facies, et praecipue palpebrae, quo tumore oculi clauduntur, si hic diminuitur humeri intumescunt, demum et lumbi, cum interea variolae ipsis inhaerentes pus colligant, hoc stadium usque ad undecimum diem a febris eruptione protrahitur. — Nunc ultimum venit stadium, ubi variolae exsiccari incipiunt, et in crustas et squamas mutatae decidunt, et quidem eodem ordine, quo effloruerunt. Simul febris et reliqua symptomata cessant, rubicundae tantummodo maculae aliquamdiu permanent. Hic variolarum quas naturales ac benignas vocant est decursus.

## §. II.

Ipsam variolarum veneni naturam nescimus, quae nobis de indole illius cognita sunt, tantummodo ex ipsius effectibus colligere possumus. Contagiosum nempe est, et quidem eiusdem attactu, contrectatione vestimentorum, linteorum, aliarumque rerum, quibus aegrotus variolis infectus usus est, inspiratione aëris halitibus variolosis referti, eisdem cum saliva haustis, cute attractis ac puris inoculatione perfertur, nec non quaedam corporis humani dispositio et certa aëris conditio desiderari videtur, si illud variolarum venenum vim suam in homines exhibere debet. Exempli enim exstant, variolas hominibus quibusdam esse inoculatas, et accidisse,



accidisse, vt ipsae non efflorescerent, tempore autem aliquo interiecto sponte sua variolis naturalibus infectos esse.

Ex magna quoque obseruationum copia certissime constat, illas vna tantummodo vice vnum eundemque hominem inficere.

### §. III.

Variolarum virus semper idem est, ac ipse morbus, si per se eum spectamus, benignum. Modo quibusdam causis accedentibus perniciosissimum euadere potest malum. Haec sunt irritamenta varia in corpore ipso, praesertim autem vermes intestinales, qui, si cum variolis adsunt, valdopere eas possunt perniciosas reddere. Constitutio singulorum aegrotorum valde etiam mutat subsequenter morbum, nec non temperamentum aegrotantis, habitus, aetas, victus ratio, vitae genus, hereditaria labes, anni tempus, aliorum morborum complicatio, inepta medela et alia. Certum enim est constantique experientia confirmatum in vna eademque epidemica constitutione, imo in eadem familia et domo, vti alios quoscunque morbos, aliam indolem assumere videmus, sic quoque variolas multiplici ratione, symptomatumque grauitate variare. — Innumera enim occurrunt exempla vbi primus benigna admodum specie, hanc vero excipiens confluyente maligna et mortifera aegrotus afficitur.

afficitur. — Hoc etiam patet in variolis inoculatione pro-  
genitis, quae etsi vna eademque materies variolosa ad infi-  
tionem adhibita fuerit, haud exiguum quandoque inter ipsas  
discrimen est ortum. — Immo ex confluentium quas vo-  
cant pure discretas et benignas, ex discretarum benigna-  
rumque contagio, confluentes malignasque non raro  
procreari nouimus. Constitutioni aëris epidemicae sem-  
per sese etiam accommodant variolae; sicuti enim alii  
morbi saepius repentina aëris mutatione maxime maligni  
redduntur, sic eadem est ratio variolarum. Interdum enim  
tam lenes atque benignae illae sunt, vt sine vlla febris ne-  
que ante neque post eruptionem, aut certe cum leuissima  
quae vix obseruari potest, erumpant, ac paene sine omnibus  
periculosis praetereant symptomatibus; idque speciatim eue-  
nire in laxiori sanguinis diathesi, SYDENHAMIUS *a)* animad-  
vertit, in qua tota separationis periodus, vt ipse ait, sensim  
et gradatim transigitur. — Plerumque tamen febrem ex-  
citant, cuius ope natura venenosam materiam in cutem de-  
ponit. Quodsi vero aut putrida, aut biliosa aut neruosa  
febris epidemica his associetur, quis est qui miretur, si va-  
riolae, quae primum optimae indolis esse videbantur, natu-  
ram in peius commutant? — Scriptorum etiam principes  
in hac obseruatione maxime inter se conueniunt. HUXHAM *b)*  
ipse

*a)* Opuscula vniuersa, Sectio III. cap. II.

*b)* Liber de febr. Cap. I. de variolis.



ipse ait, vnus eiusdemque morbi varios effectus in varia solidorum et fluidorum constitutione nullo in casu magis, quam in variolis esse euidentes. Peculiari enim aëris statui proprium esse videtur, vt alia aliaque ratione solida et fluida afficiat, quae ea aliis aliisque febribus reddat obnoxia. — Aliam enim athmosphaerae constitutionem ad febres inflammatorias, aliam ad febres lentas et neruofas, aliam ad febres biliofas, ac aliam ad putridas, malignas aut petechiales excitandas pronam inuenimus; quando igitur contagium cum vna vel altera constitutione accidit, et cum illa simul agit, vnā vel alteram variolarum, vel potius febris cum variolis excitabit speciem. Rationi etiam consonum est, constitutiones variolarum epidemicas modo benignas modo malignas, magna ex parte deberi praecedentium tempestatum aërisque ingenio peculiari, solidarum fluidarumque partium statui. — Si variolarum morbus hominem robusti ac validi corporis invadit, vehementissima febris inflammatoria saepissime associatur, vnde modo pulmones, modo cerebrum et aliae corporis humani partes multum mali inflammatione pati possunt, vbi V.S. instituere debemus. Aliquando accidit febris nervosa, quae plerumque lymphaticas aut crySTALLINAS parit variolas — aliquando febris putrida coniungi potest, vbi sanguis dissolutus variolas efficit putridas. Nec non etiam quam saepissime cum statu bilioso connubium variolarum est obseruatum, vt inter alia in epidemia accidit, quam



STOLLE *c)* nobis describit. Hic ipse *d)* etiam confirmat obseruationes numero non paucas in eam sententiam ipsum adduxisse, variolas et morbillos eundem semper morbum, eumque benignissimae indolis, nisi omni semper at saltem potiori tempore esse, quae soli, extra consortium prauum cito decurrunt et periculo carent, sed quas a miti ingenio suo popolare temporis vitium detorquet, efferatas reddit et exleges; ipse etiam pergit, ex hac opinione eam sibi legem in sanando utroque morbo stabiliuisse, ut febrem epidemicam, cuius praesentiam et commixtionem cum ipse anomalus variolarum morbillorumque decursus, tum propria epidemiae ipsius notae illum docuere, methodo efficaci et directa curet.

#### §. IV.

SYDENHAMVS *e)* obseruare etiam voluit, eundem morbum epidemicum in ipsissima anni constitutione varia saepe et dissimili facie sese ostendere, quod ad tempora attinet principii, status et declinationis morbi. — Quin et variolas ad exemplum epidemicorum aliorum quorumlibet, primo statim insultu atrociores esse, atque in dies increbrescere,

*c)* *Rat. med. T. II. p. 222.*

*d)* *Ibid.*

*e)* *Opuscula vniuersa Sect. I. cap. II.*

fcere, donec ad statum perueniant, quem semel transgressas tum quoad symptomatum vehementiam, tum aegrorum numerum sensim imminuere. — Quae mihi tamen dissimilitudines ab eadem varietate constitutionis aeris diuersis anni temporibus oriri videntur. Sic noscimus aestiuo tempore propensionem quamdam ad putridas, autumnali ad biliosas, hyemali ad inflammatorias et verno ad catarrhales febres humano in corpore suscitari. Et aëris et tempestatum diuersae varietates has ipsas quoque dispositiones commutare queunt, et hac ratione fieri potest, vt per totius anni spatium vnusquisque mensis aut quaedam hebdomades tales epidemicarum constitutionum mutationes procreent, quae plane diuersam eiusdem morbi curandi rationem efflagitant.

### §. V.

His itaque praemissis neminem fugiet, medendi variolarum rationem modumque non semper ac vbique sibi constare, sed quando et ratione et bono cum successu variolis mederi velimus, tam epidemicae constitutionis et febris variolis se commiscantis, quam etiam singulorum aegrotorum, nec non aliarum illarum caussarum quas supra nominauimus, habendam esse rationem; quicumque enim semper eadem ac immutabili methodo variolis mederi vellet, saepius aegros sanaret suos, quam saepissime etiam ipsa eademque methodo illos occideret.



## §. VI.

Quidam suadent in initio morbi, praesertim tempore eruptionis aegrotis regimen calidum administrare. Variolarum enim eruptionem cum sudore fieri, aegrotosque, eruptione facta melius se habere animaduerterunt, indeque sunt ratiocinati, morbum leniorem redditurum iri, quando illae ruptio aliqua ratione promoueatur; atque spem inde conceperunt, sanguinem a variolarum veneno, sudoris eruptione adiecta, eo citius purgatum iri: cui sententiae MORTONVS *f)* ipse conuenit; SYDENHAMVS *g)* autem essentiam huius morbi in peculiari quadam inflammatione comprehendit, in qua natura primis aliquot diebus id negotii habet, ut particulas inflammatas praeparet, subigatque, quo facilius in corporis ambitum eliminetur; quo tempore seditione mota, et perturbato iam sanguinis statu, febris ut accedat omnino necesse est. — Haec vero certo quodam gradu et tempore eget, quo miasma variolarum praeparari, extricari et expelli queat, non secus ut in fermentationibus usu venit, ut liquor fermentans haeterogeneas, impuras, inutilesque substantias fecernat ac dimittat. At illud miasmatis varioloso proprium etiam videtur, quod non modo fermentationis quandam veluti speciem suscitet, verum

*f)* Opera medic. exercitat. III. Cap. VII.

*g)* Diff. epist. ad Guilielmum Cule.



verum etiam fermenti instar plus minusue sanos humores in suam naturam transmutet sibi que assimilet. — Si vera sit haec et iusta huius morbi historia, coecus sit oportet, inquit, qui non videat omnem eiusdem euentum optatissimum a curationis fundamento recte aut secus primis in diebus iacto, pendere. Nam si calidorum et praecipue iugilectuli vsu calentes hae ac spirituosae particulae acuantur, necesse est, vt assimilandi facultas (qua iam diu plus satis pollent) adhuc intendatur et augeascit. — Hinc inde frigidum regimen ipsum in variolarum curatione (cuiuscunque fuerint generis) vbique idque promiscue adhibendum acriter contendit. Id regimen in variolis curandis quam plurimum vtile esse, vix est hodie, qui vltro non fateatur. — In omnibus omnium variolarum speciebus tamen vtraque methodus minime indiscriminatim adhibenda: vt vnicum modo exemplum hic afferam, quando nempe vires in hoc stadio valde languent, et neruosum systema imprimis afficitur, atque morbus ipse symptomatibus febris lentae nervosae comitatur; tunc nequaquam regimen frigidum adhibere possumus, quo ipso occideremus aegrum, sed moderatum, tali tamen modo ne febrilem motum nimis infringat, neque vim vitae et neruorum magis deiiciat. Quare paulo diutius lecto aeger indulgeat, atque indumentis se contegat aliquantulum grauioribus, neque se aëri liberiori et frigido temere committat, cautiusque in lecto permu-

tando aut ventilando cubiculo se gerat; intrinsecus vero ei dentur, quae quidem diluunt, sed vna moderate excitant et motum cordis atque arteriarum leniter sollicitant *h*). Si vero primo iam stadió ineunte, signa dissolutionis putridae se prodant, aut in eam pronior constitutio epidemica se ostendat, mature contra pugnandum est antisepticis proprie dictis, non neglecta interim cubiculi et lecti ventilatione et mora, si fieri potest, aliqua extra lectum in aëre puro, aperto et subfrigido; cui sententiae HVXHAM *i*) ipse consentit: inquit enim, interdum SYDENHAMII, interdum MORTONI conuenire potest methodus.

## §. VII.

Neque vero sanguinis emissionis vsum adeo frequenter in omni variolarum impetu adhibitum comprobare possumus. Vbi sanguis spiritusque valde agitati eius circulationem maxime rapidam reddunt, natura eo magis perturbata, nulla ordinata via materiam morbosam expellere, multo minus concoquere, aut quoque consuetas et naturales efficere valet secretiones, talibus in casibus sanguinis emissio vix eruptionem, ad minimum vltra iustum eius terminum non retardat, sed cum fluidi vitalis motus nimis vehementes compescat et ordinata magis spirituum animalium secretionem

*h*) Burserius institutiones medic. pr. Cap. de variolis.

*i*) loc. cit.



tionem efficiat, istas magis iuuabit immo in eius operatione succurret. — Numquam vero in complicatione variolarum cum febre putrida vel lenta neruosa sanguinis missio locum habet, quia vires illico exsoluit, putredinem accelerat et mortem.

### §. VIII.

Talia cum essent, quid nunc de praeparatione generali illorum, qui insitionem sunt subituri, cogitandum est, vbi peculiare quaedam Corticis Peruuiani et Mercurii praeparationes, vt antidota, in omnibus subiectis laudatae sunt. Nonne vnum idemque profecto medicamentum varia in constitutione corporis aegroti, varias edet effectus? et temere ageret, qui corticem et roborantia cardiaca cuidam fibris fortibus et rigidis ac sanguine densiori viscido praedito, vt prophylacticum aut praeparans dare vellet; licet ista in statu vasorum debili et laxo ac tenui et aquoso sanguine instructo magnam vtilitatem afferre possint. Num etiam mercurialia in nimis laxo cohaerenti et dissoluto sanguinis statu conuenient? Balnea quoque tepida in vniuersum quasi prophylactica etiam atque etiam sunt commendata; vt cutis per ea ad leuiorem variolarum eruptionem praepararetur. — Sed tamen et haec tunc praecipue adhibenda esse mihi videntur, si aspera est cutis atque quasi immeabilis, et natura ipsa obstacula opposita vincere nequit.

Itaque



Itaque et hic semper ad constitutionem singulorum respicere et illorum conditioni praeparationem accommodare debemus. STOLLE *k)* ait: quo modo praeparare hominem oporteat, infitioni subiturum, auctores diuersimode opinantur. At antecellere omnes alios ea methodus videtur, quae quod in homine vitiosum est, prius sanat, eumque extra epidemiae aut praesentis aut iamiam imminentis assultum, tamquam extra morbiferi teli iactum, quam longissime remouet.

### §. IX.

Hinc inde etiam inoculationis optatus dependet successus, ut tempore non simus exclusi ad vnumquemque aegrotaturum pro sua singulari conditione praeparandum. Sic si aeger est plethoricus V. S. antea est exhibenda, si naturae deficiunt vires, tunc illae roborantibus cardiacis subleuandae et sic porro; simulque in hanc rem aptissimi aetatis temporis ratio habenda est, et quidem intra annum quartum et duodecimum, ante quod temporis spatium dentes plerumque apparere solent; contra experientia sumus edocti in aetate robustiore ac virili pluribus iam euolutis in corpore cupiditatibus, maius periculum variolas comitari. — Hic quoque infectionis locus eligi potest; cum enim naturales variolae, ut plerumque fit, per ventriculum

*k)* l. c. p. 238.

triculum et pulmones impertiantur, multa ante semper procreant incommoda, quam materies variolosa in cutem deponatur; istis autem in iustum et proprium locum statim productis homines illa difficilia et molesta symptomata nequaquam sentiunt. — Simili modo etiam ab aliis morbis corpus aegroti prius liberamus. Ita omnibus periculosis ac molestis conditionibus ante sublatis, nihil relinquitur, quod variolas a bona sua indole deducere queat, ipsaeque bene et optimo cum successu defluunt.

### §. X.

Iam supra commemoravi, diuersam aëris conditionem humani corporis tam solidas quam fluidas partes ita permutare posse, ut ipsum modo ad hanc modo ad illam febris speciem propensum reddat, eodem quoque modo animadvertimus peculiarem aëris constitutionem, quae catarrhorum saepissime est causa. Sicuti autem variae febrium modificationes variolis sese coniungentes harum propriam ac benignam indolem commutant, ita etiam catarrhi comitari solent variolas, qui eas malignissimas saepe reddunt. Cum itaque variolae dominantis epidemicae aëris constitutionis characterem semper induant, et per eam in ipsarum decursu maximam patiantur mutationem: maxime miror quo tandem accidit, ut connubii variolarum cum catarrhali constitutione tam parum mentionis fiat. Nam praeter



LENTINVM 1), qui talem variolarum cum febris catarrhali coniunctionem duobus in locis nobis descripsit, et HVXHAMVM, qui in dissertatione sua de variolis, catarrhales etiam commemorat, perpauci, quos equidem perlegi, medicae artis scriptores, mentionem de illis faciunt, et hi ipsi, qui aliquid hac de materia referunt, neque satis accurate et praecise, neque satis copiose eam tractauerunt materiam. — Quae cum ita essent, hac occasione mihi optatissima utar, et operam quam possum maximam mihi dabo in expositione symptomatum et decursu huius variolarum coniunctionis, tum idoneae et aptissimae curandi methodi, tum etiam in auertendis sequelis malae indolis.

## §. XI.

Causam proximam catarrhorum ipsorum tribuunt quidam transpirationi impeditae, cum illi plerumque a refrigerio corporis aestuantis originem suam ducant; non semper tamen catarrhalium epidemiarum causae tantummodo in transpiratione impedita sunt quaerendae. — Haud raro singularis quaedam ratio aëri inesse ac specificum quoddam miasma ex aëre corpori humano impertiri videtur, sicuti

WEIKARD

1) *De aere, vitae genere et morbis Clausthalienſium annorum 1774-1777. et Beobachtungen der epidemischen und sporadischen Krankheiten am Oberharze im Jahre 1777-82.*



WEIKARD et multi alii confirmant; quod ex permultis epidemiis catarrhalibus constat, quae tam repente progrediuntur et eos quoque homines, qui robore peculiari adversus omnes perspirationem turbantes causas praediti sunt, inuadunt. HUXHAM *m*) etiam febres catarrhales non a transpiratione impedita solum deriuauit, sed etiam ab acrimonia ex aëre corporibus hominum communicata: alias inquit difficile intellectu esset, unde tam subita saepe subeat commotio homines, algido vdoque aëri expositos, tam immensa destillatio humoris per nares, oculos, fauces; adeo acris saepe vt vel ipsam cutim erodat, ac tusses vehementes moueat et sternutamenta perpetua: neque haec in paucis duntaxat, sed et per innumeros vndique simul et semel dispergitur morbus. — Nemo igitur mirabitur variolas, si diuerso modo talis acrimonia iis consocietur, benignam permutare debere in peiorem indolem.

## §. XII.

Rarissime tamen catarrhus purus nec immixtus existit, sed maxima ex parte febris tunc temporis dominantis characterem assumit, inde in decursu ac symptomatibus, magnae intercedunt diuersitates, ideoque plane diuersam exigit tractandi methodum. Tale connubium materiei catarrhalis cum putrida sanguinis crasi mihi videtur protulisse variolas

C 2

illas

*m*) *Opp. phys. med. T. I. p. 370.*

illas anomalas confluentes epidemicas annorum 1670-1672, quas SYDENHAMVS *n*) descripsit: confluentes enim has ab aliis, vt ipse ait, quas per alios annos obseruauerat, confluentibus, in multis discrepasse, nunc secundo, nunc tertio die se primum monstrabant, specie tumoris subrubicundi atque vniformis, vultum omnem contegentis, erysipelate quidem densioris, nullo fere visibili pustularum discrimine; reliquum corpus congeries quaedam (ceu panni latiores) ex infinitis propemodum pustulis rubris efferatis in vnam conflatae variegabant, inter quas sparsae, in femoribus praecipue, vesiculae quaedam satis conspicuae, ambustorum ad instar, sero limpidiore distentae eminebant, quod quidem disrupta subinde pellicula copiose effluebat, subiecta carnis nigredine sphaceloque quasi affecta; et febris et symptomata alia omnia, vel quae praecedebant, vel comitabantur hoc variolarum genus, grauiora erant, aegri ad saluationem erant procliuiiores.

### §. XIII.

Non minus etiam variolae illae crystallinae in epidemia Iglaviensi, quam SAGARIVS *o*) describit, hic mihi pertinere videntur. Crystallinae enim et verrucosae, ille ait, vt omnia stadia longiora habuerint, ita etiam stadium suppurationis,

fi

*a) Opuscula vniuersa, Sectio IV. cap. VI.*

*o) Diff. de variolis Iglaviensib. anno 1766.*



si tamen suppurationis sine suppuratione dici potest, protraxerant, donec lymphæ vel materies lardacea ex papulis ruptis, arrosis sibi exitum parasset, stadiumque hocce terminasset. — Tristes et anhelii erant infantes quidam pure opprimente pulmones; pulsus tum aderat inspirationis tempore deficiens, aut penitus intermittens; collapsus variolarum, nigredo subinde et petechiae atropurpureae ferali omine cutim hinc inde obsidebant; alios pure ad caput ruente phrenitis exstinxit; alios convulsio contorfit; in quibusdam materies pestilentialis partes oris sibi praeeligens fauces, palatum pendulum, fornicatum, nares, maxillas consumpsit, dentes pessumdedit adeo ut nati deplorandi dentem unum post alterum, tum maxillas per partes propriis sibi manibus eximerent, licet debilissimi cunctis stupentibus et dolentibus, qui circumierant; crudelissima materies vasorum lumina occupavit, eaque inflammans et corrumpens in liquamen convertit.

Feliciores, quorum cutim materies petens tubercula rubra excitavit fabae magnitudinis circiter; quae post unam alteramve diem alba facta et rupta materiem acrem serosam, cutim rodentem pluebant, feliciores hos studiose dixi; nam plerique febre et reliquis symptomatibus post dictam crisin servati sunt omnes, ubi priorum rarissime ullus evasit.

Causam ipse crystallinarum harum variolarum inquirens, assignat illam constitutioni aëris antecedenti humidac, nebulosae, austrinae et boreali, transpirabile retinendo intra, corpuscula solida laxando, quae etiam vt plurimum catarrhis amica. Quid itaque, pergit, clarius exprimi potest, quam per datam delineationem tempestatum causa variolarum, quarum historiam exaro, expressa est: humida enim fuit valde constitutio, nebulosa, iam aquilonia, iam austrina, hinc crystallinae et flaccidae filiquosae originem ducebant, haec etiam causa fuit quod ipsae purulentae diutius pus coxerint. Sic etiam et alia modificatio febris adiungere se potest, tunc et alia edet symptomata et alia inde enascentur pericula, aliaque requiritur methodus medendi.

#### §. XIV.

Antequam ad ipsam casuum in variolis catarrhalibus obuenientium descriptionem transeam, illud adhuc praemit-tendum esse censeo, quod ipsae plurimum verno tempore et humida quidem ac nebulosa et frigida aëris temperie, quae quoque catarrhis maxime fauet, comprehendantur. — Si igitur variolae aut vere aut supra descripta tempestate contagiosae fiant, ex sufficientibus rationibus tunc coniunctionem hancce suspicari, atque iam sese praecingere possumus; haec admonitio eo magis necessaria est, cum epidemia irruente non modo quatuor aut sex, sed multo plures aegroti



aegroti simul curandi sint, ita ut ipsorum numerus in epidemia aliquantulum longe dissipata intra aliquot dies usque ad centum et amplius augeatur, quod praecipue in catarrhalibus epidemiis contingere solet. — Quodsi quis in tali ut ita dicam inundatione vniuersali morbi indolem plane ignoraret, neque statim in ipso initio bene perspectam et cognitam eam haberet, neque eius originem e praecedentibus et praesentibus definire posset, is aegrotorum multitudine paene perturbaretur, et primis hoc morbo laborantibus temere et inconsulto, caeteris vero haud melius confu-leret; nonne enim in maxima turba aegrotantium animi tranquillitas expellitur, qua indigemus ad singularum partium naturam et connexum vniuersi cognoscendum. — His vero expositis et illustratis aegrotum conuenientius percontari et simul idonea medicamenta praescribere possumus.

## §. XV.

Catarrhum ipsum adesse facile ex ipsi propriis casibus cognoscere possumus, ut e frigore saepius obruente ac aestu; frequenti sternutatione, e naribus et oculis acre quoddam serum effluit, tussi crebra afficiuntur aegroti et micturiunt; capite sunt perturbati; in ipsa fronte pressionem et stupiditatem sentiunt. Inter diu in melius abeunt, ad vesperam autem exacerbationes patiuntur. Hisce demum variolarum signa diagnostica se adfocient. Quando igitur descripti casus

casus incidant, et variolae in eadem regione ac loco, vbi versamur, dominantur, si etiam in habitaculo, in quo variolis laborantes viuerent, commoratus sit aeger, neque variolarum morbum iam perpeffus, haud iniuste tunc suspicari possumus, variolas mox apparituras et demum catarrhales euasuras.

## §. XVI.

Nunc quidem distinctius expositurus sum, quatenus variolae a catarrhali illa acrimonia ratione symptomatum et decursu variant

I. Variolae maturius effrondescent, nam duplici stimulo catarrhalis acerbitatis cum variolarum veneno coniuncto, impetus in aegroti corpore augetur. Omnia symptomata atrociora itaque sunt, febris scilicet, quae ob naturam catarrhalem vespertinas suas habet exacerbationes, anxietas et alia, vnde fit, vt praematurius promoueatur variolarum eruptio.

II. Ob naturalem tractum materiei catarrhalis fauces imprimis et oculi patiuntur, inde semper iam imature salivatio acerrima et molestissima se ostendit. Non minus oculi patiuntur ob humores illos acres semper effluentes. — Obseruatum quoque est, plurimas variolas erumpere in facie et in corpore ipso paucissimas inueniri, quod LENTIN quoque



que animaduertit: ipse enim in tali epidemia catarrhali vidit, oculos neque vllius infantis tam diu infectos fuisse, quam illa pura ac biliosa constitutio durauit; contra permultis, etiam nonnullis eorum quibus inoculatae erant, in oculis effloruerunt, dum ad vnum omnes catarrhalis status prehenderit.

III. Quam plurimum periculi quoque affert transpiratio impedita. — Sub tanto febris spasmodumque enim tumultu aeger non ita prompte in sudores dissoluitur, ac in illo discreto genere, vbi magna vt fit, ad eosdem propensio vt plurimum praenunciat variolas, quae mox erumpunt, minime confluxuras; variolarum materies igitur aduentu humoris catarrhalis ita commutata, vt magis liquida sed etiam acrior reddita, in corpore maneat, conuulsioneque mortifera hominem correptum iugulet. Vidit enim LENTIN aegros dies noctesque incassum vltos, sub immuni spasmodum, vigiliarum, dolorumque tyrannide fere iugulatos, nisi vicaria alia excretio illa substituatur, quod praecipue ab aucta excretionem vrinae sperandum, quae tamen hic etiam saepe turbatur: sub acutissimis enim doloribus in regione lumborum, nephritici paroxysmi aemulis, renes ne guttulam quidem vrinae fecernunt, obseruante LENTINO, immo aegri necessitate ad meiendum ne stimulantur quidem, cum non habeant in vesica vrinam, vel tantum paucam, igneam, graueolentem, omnem pudendorum viciniam arrodentem,

lintea turpiter tingentem et aegrum perpetua vesicae vellatione et ani tenesmo valdopere excruciantem. — Vidit ipse infantem nondum biennem, variolis decumbentem, ante suppurationis stadium urinam adeo mordacem emittere, ut non citius cutem madefaceret, quam infans attractis clunibus eius fugiendi causa affiliret.

IV. Variolae hae numquam bene maturescunt, sed materia manet cruda, tandemque fit merus aqueus ichor ac eae plurimis in locis confluunt et admodum largas effingunt vesicas; quae denique disruptae omnia corrodunt et aegrotum exulcerant, ita ut lepori corio priuato appareat similis. Nascuntur itaque confluentes et crystallinae.

V. Huius tenuis crudaeque materiae maxima pars faepius iterum absorbita ad sanguinem perfertur, et insignem pustularum flaccidarum, vacuarum vel filiquosarum, ut dicitur, relinquit copiam. Facilis hic enim latex, vel pauore forte inrepente, sub quo cutis vasa inania fiunt et expallescent atque facile sibi attrahunt et absorbent humores proximos, vel quavis alia causa, quae transitum sanguinis ad cutem et venas cutaneas impediat, quo minus faciliori negotio sanguis ex arteriis transire in venas possit. Maximeque id patitur fluxilis humor et nullo coercitus parietum pustulae obstaculo, ne venis absorbeatur: quod in alterius ordinis variolis suppuratis facile non fit, obstante aut muco

Malpig-



Malpighiano non penitus confumpto, aut propria puris visciditate.

VI. Retrogressus causticus ille latex nervis est maxime inimicus, et terribiles in scenam producit morbos, nouamque tragoediam iterum ludit, quae plerumque mortifera finitur catastrophe; rigores enim conuulsiui, febres peripneumonicae, delirium, dysenteria, syncope caeteraque sunt pedissequae. Quod si enim febris valida sit, variolae non flauescunt, sed materia acris, fusca aut rubicunda repletae sint, status longe periculosior est, etsi reliquae circumstantiae bonae esse videantur.

VII. Nullum denique genus variolarum magis cicatricosum reddit hominem quam hoc. Etenim acris materies vicinas saepe arrodit partes, febrem accendit, inquietudinem, anxietates et spasticas producit contractiones, unde non raro mala innumerabilia generantur; aut materies haec ad sanguinem deponitur, partes internas inficit, et nonnumquam subitam mortem affert.

## §. XVII.

Quae praecipua sunt symptomata immixtione catarrhalis acerbitalis variolarum veneno-contingentia, quae equidem ex ambabus illis epidemiis a LENTINO descriptis, et ex HUXHAMO collegi. — Praeterea vir illustris ac celeberrimus

MUS STROMEYER annorum 1781-84 in hac ipsa vrbe Göttingae epidemiam similem curandam habuit, cuius praecipua symptomata ab illo mihi beneuole communicata cum iam descriptis plene consentiebant. Citius scilicet apparebant, plurimaeque potissimum in facie, ore, naribus et oculis, in caeteris vero corporis partibus rarissimae. — Confluebant etiam ob rapidam eruptionem nec non lymphaticas habebant intermixtas variolas, ceterum erant mitissimae.

### §. XVIII.

Quod ad prognosin spectat, catarrhales variolae per se neutiquam malignae euadunt, nec non si cum statu inflammatorio sint coniunctae: non vero eodem modo res se habet, si biliosae aut neruosae, aut putridae sint, aut vermibus associatae. Perniciosissimae aegrotis vitiosis pulmonibus instructis, existunt. Saepius quoque ipsae vitiosas eas relinquunt. — Oculi saepe etiam valde per ipsas deformantur. — Quod si variolae in naribus aut in ore erumpant, maximum tunc periculum a respiratione impedita oritur. — Si quando largus fudor vnquam in variolis est salutaris, in hac est specie: maximum nempe periculum a retrogressionem tenuis huius et acris materiae superuenit. — Nihilo minus si diarrhoea moderata aut vrina copiosa materia saturatius tincta subsidente ea aufertur, aegrotus saepius conualescit; quod si vero deiectiones alui nigrae, cruentae aut saniosae accedunt, eae genera-

tim



tim destructionem intestinorum indicant, si in primis abdomen est tumidum dolens et tensum.

Atque micturitio aut perpetuus emittendi vrinam conatus sine aliqua eius insigni euacuatione, nisi a vesicatoriis ortum trahat, symptoma est pessimum.

### §. XIX.

In ipsis curandis his variolis potissimum id spectandum est, qualis naturae malum sit, num catarrhus admixtus simplex sit et benignus, aut cum alia quadam vel inflammatoria, biliosa, putrida, vel neruosa febre coniunctus. Tunc semper in primis huic febris indoli secundum regulas vniuersales occurrendi opera est danda; simul etiam noxae ab ipsa catarrhali materia illatae, omni cum studio depellendae sunt. — Quod ad has proxime attinet conandum est, acrem catarrhalem humorem inuoluere, confluxum humorum a capite deducere, quoniam, vt supra dixi, plurimae pustulae in hoc genere variolarum, ob naturalem confluxum materiei catarrhalis, in facie erumpunt; simul opera danda est feri abundantiam e corpore eliminare; vt humores naturalem integritatem rursus induant, et ita ad pus benignum elaborandum disponantur.

Humores abundantes lenibus diaphoreticis et inprimis diureticis e corpore abiguntur, cum autem febris aliqua, li-

cet mitiori aegroti illi semper laborent, nullo modo comprobare possumus, calefacientia incidentia illa, ut essentia Pimpinellae albae a LENTINO laudata. — Ne autem humores acres per maxime irritabiles urinae vias transeuntes, illas valde irritent et dolores recentes et noxam pariant, aegrotis potum demulcentem saepius dari praecipendum est.

Ad variolarum eruptionem a facie abigendam conduce-  
ret aegrotos ante ipsam eruptionem bis aut ter balneis tepidis immittere, quo cutis peruia redderetur et variolarum venenum versus cutem alliceretur.

Rhases iam ipse in variolarum morbo balnea vaporum adhibuit. Quin etiam frictio panno laneo in balneo ipso instituta maxime conueniret. Ut porro catarrhalium acrium humorum confluxus ab oculis euitaretur, unde ipsi multum doloris accipiunt, intra morbi decursum vesicatoria pone aures posita haud infalubria essent.

Saliuatio iam mature accedens leniter est sustinenda, qua de causa aegroti quam saepissime copiosa potulenta sunt porrigenda, et quidem mucilaginosi ad acritatem leniendam, idemque collum externum calidum seruare debet. Quoniam humores acres ut irritamenta hic agunt et tantos insultus ac spasmos pariunt, quibus febris, anxietas, insomnia et alia symptomata augentur, facile intellectu, opiata hic saluber-  
rima



rima esse. *HVXHAM* ipse ait, nulla dantur remedia, quae tam efficaciter humores tenues acres inspissent, eorum irritationem et defluxum auertant, et pustulas maturent quam opiata conuenienti ratione data.

Quod si vero catarrhus diutius durauerit, et apparentiam systematis concoctionis declinationes, tunc medicamenta aluum laxantia sunt praescribenda.

Quod ad diaetam attinet aegrotos oportet abstinere ab omnibus acribus et aestuosis tam cibis, quam potibus, non carne, sed tantum vegetabilibus vesci, simulque calidiores, quam solemne erat esse, sed ne quid nimis.

Acritate hoc modo inuoluta et, si nimia confluentibus alioquin variolis materiam subministrante, eliminata, spasmi etiam praecauentur; cum verisimilitate sperare tunc possumus variolas irruentes bene suppuratas iri.

Si nihilo minus confluant variolae et vesiculas acribus humoribus repletas conforment, alia enascuntur inde discrimina maxime timenda, ex illorum retrogressionem ab tenuitate magna humorum; tali in statu consilium *HVXHAM* sequendum esset, ut nempe vesicas rescindas, humoremque acrem emittas, qui alias facile latius vagatur et resorbetur. Neque vesicatoriis in hoc stadio parcendum est, et profecto quando copiosae adsunt pustulae sine opiatis parum efficere valemus,

valemus, cum istae in hoc morbi tempore valde dolent. Praeter haec et diuretica adhuc adhibenda, et aliae excretiones sustinendae.

Tempore, quo variolae ficcantur, maximum semper periculum instat: nunc quidem cutis deformis papulis est obsita, atque canales exhalantes omnis generis illuue sunt obducti, natura ergo perniciosus exonerari nequit humoribus, ipsi resident in corpore, occupant partes corporis humani nobiliores, ex quo suppurationes oriuntur, quae eo sunt perniciosiores, quo minus pus benignum sperare possumus. Nonne optime versabimini si LENTINO hoc consilium nobis praebenti, morem geramus, cutem videlicet molliorem balneis tepidis reddere, ita ut ad materiem perniciosam immitendam sit idonea?

Creberrime observatum est, materiam hanc tenuem, acrem variolosam ad intestina et saepius quidem valde violenta ratione transferri. — Innumera etiam in variolis praestant exempla, ubi aegroti vitam critica quaedam servauit diarrhoea; natura ipsa enim in infantibus hanc euacuationem in locum saluationis substituit, in adultis illam itaque ne praemature nimis vnquam cohibeamus, solliciti esse debemus. Omnino, ut breui dicam; quam viam et rationem sese exonerandi natura ingreditur in ipsa adiumento illi esse debemus.

Cum



Cum tali modo modificationem febris associatam mitigamus, et catarrhalem constitutionem impugnamus, variolae nunc nullo obstaculo interposito, secundum naturale et mite ingenium, stadia sua bene ac feliciter percurrent.

## §. XX.

Ad incommoda, quae sunt accumulationes materiae purulentae in praecipuis corporis partibus, praesertim autem versus oculos adactae, quae vti iam monui, eo magis timendae, quo minus pus benignum expectandum, euitanda, per aliquantulum temporis spatium materiae variolosae nimis assimilatae deiectione per vias solemnes rite retinenda est, quo corpus aegroti ab humoribus acribus penitus liberetur.

---

# *T H E S E S.*

---

## *I.*

*Inflammationis caussa proxima non est obstructio.*

## *II.*

*Sanguinem vix purgant, sed inquinant potius ulcera artificialia.*

## *III.*

*Solutio placentae non est acceleranda, sed fere semper naturae committenda.*

## *IV.*

*Bonus theoreticus, non semper est bonus practicus.*

## *V.*



V.

*Motus retrogradus fluidorum in vasis lymphaticis locum habere potest in statu morbofo.*

VI.

*Febris puerperarum omnis generis esse potest.*

VII.

*Hirudines plethoram topicam plus augment, quam minuunt.*

VIII.

*Aër dephlogisticatus purus vitam hominum minime protrahit.*

---

71

Handwritten text, likely bleed-through from the reverse side of the page.

72

Handwritten text, likely bleed-through from the reverse side of the page.

73

Handwritten text, likely bleed-through from the reverse side of the page.

74

Handwritten text, likely bleed-through from the reverse side of the page.



**UNIVERSIDAD NACIONAL AUTONOMA  
DE MEXICO**

